

## **Lei 10/1993, do 15 de xullo, de concesión dun crédito extraordinario para atende-los gastos das eleccións ó Parlamento de Galicia**

### Tramitación parlamentaria:

Proxecto de lei, BOPG núm. 397, do 23.4.1993. Corrección de erros: BOPG núm. 409, do 13.5.1993.

Emendas, BOPG núms. 409, do 13.5.1993, e 416, do 3.6.1993.

Informe da Ponencia, BOPG núm. 421, do 15.6.1993.

Dictame da Comisión, BOPG núm. 427, do 25.6.1993.

Mantemento de emendas e votos particulares, BOPG núm. 427, do 25.6.1993.

Debate e aprobación polo Pleno, DSPG núm. 163, do 30.6.1993.

### Publicación:

*Boletín Oficial do Parlamento de Galicia* núm. 429, do 1.7.1993.

*Diario Oficial de Galicia* núm. 141, do 26.7.1993. Corrección de erros: DOG núm. 147, do 3.8.1993.

*Boletín Oficial del Estado* núm. 271, do 12.11.1993.

## **Lei 10/1993, do 15 de xullo, de concesión dun crédito extraordinario para atende-los gastos das eleccións ó Parlamento de Galicia**

A convocatoria de eleccións ó Parlamento de Galicia de 1993 esixe que a Administración autonómica habilite unha serie de medios humanos e materiais para levar a bo termo o proceso electoral, e é por iso que, dándolle cumprimento ó disposto na Lei 8/1985, do 13 de agosto, modificada pola Lei 15/1992, do 30 de decembro, de eleccións ó Parlamento de Galicia, e demais normativa vixente, resulta necesaria, ó abeiro do artigo 62 da Lei 11/1992, de réxime financeiro e presupostario de Galicia, a concesión dun crédito extraordinario que permita atende-los gastos indicados.

Co fin de que o dito crédito extraordinario non produza incremento de gasto público, o seu financiamento levarase a cabo anulando remanentes de crédito de distintos capítulos do presuposto de gastos vixente, antes do 31 de decembro deste ano.

Por todo o exposto, o Parlamento de Galicia aprobou e eu, de conformidade co artigo 13.2 do Estatuto de Galicia e co artigo 24 da Lei 1/1983, do 22 de febreiro, reguladora da Xunta e do seu pre-

sidente, promulgo, en nome de El-Rei, a Lei de concesión dun crédito extraordinario para atende-los gastos das eleccións ó Parlamento de Galicia.

### **Artigo 1**

Concédesse un crédito extraordinario ó presuposto de gastos vixente da Comunidade Autónoma por un importe de oitocentos sesenta millóns oitocentas trinta mil catrocentas corenta e cinco pesetas (860.830.445 ptas.), tal como se especifica no anexo da presente lei, co obxecto de atende-las obrigas que se deriven da celebración das eleccións ó Parlamento de Galicia en 1993.

### **Artigo 2**

Este crédito extraordinario financiarase mediante a anulación de remanentes de crédito dos distintos capítulos do presuposto de gastos correspondentes ó financiamento básico e incondicionado dos vixentes presupostos xerais da Comunidade Autónoma. O Consello da Xunta, por proposta do conselleiro de Economía e Facenda, antes do 31 de decembro de 1993, determinará as aplicacións presupostarias dos citados créditos.

### Artigo 3

De acordo co artigo 45 da Lei 8/1985, do 13 de agosto, modificada pola Lei 15/1992, do 30 de decembro, de eleccións ó Parlamento de Galicia, a Comunidade Autónoma de Galicia concederallles anticipos de subvencións para gastos electorais ata un 30% das cantidades concedidas en concepto de subvencións electorais ós partidos, federacións, coalicións e agrupacións de electores nas eleccións celebradas ó Parlamento de Galicia de 1989. O importe indicado de anticipos de subvencións está incluído no crédito solicitado, tal como se desprende da desagregación que figura no anexo.

### Artigo 4

De acordo cos artigos 46 e 47 da Lei 8/1985, do 13 de agosto, modificada pola Lei 15/1992, do 30 de decembro, de eleccións ó Parlamento de Galicia, os partidos, federacións, coalicións e agrupacións de electores que cumpran os requisitos esixidos para recibiren subvencións da Comunidade Autónoma de Galicia, ou que recibisen anticipos con cargo a elas, deberán presentar dentro dos catro meses posteriores ás eleccións unha contabilidade detallada e documentada dos seus ingresos e gastos electorais.

O Consello de Contas pronunciarase sobre a regularidade das contabilidades electorais dentro dos sete meses seguintes á celebración das eleccións e remitira-

lles á Xunta de Galicia e ó Parlamento de Galicia o contido da fiscalización mediante informe razoado e detallado.

Dentro do mes seguinte á remisión do informe a que se refire o apartado anterior, a Xunta de Galicia presentaralle ó Parlamento de Galicia un proxecto de crédito extraordinario por importe da subvención final por adxudicar. En ningún caso este crédito superará a cantidade que corresponda como liquidación das subvencións ás formacións políticas, de acordo co artigo 44 da Lei 8/1985, do 13 de agosto, modificada pola Lei 15/1992, do 30 de decembro.

### Disposición derradeira

Autorízase a Xunta de Galicia para dicta-las disposicións necesarias para o desenvolvemento e a aplicación desta lei.

A presente lei entrará en vigor o día da súa publicación no *Diario Oficial de Galicia*.

(1)

Santiago de Compostela, 15 de xullo de 1993

Manuel Fraga Iribarne  
Presidente

---

(1) O anexo incorporado a esta lei non se reproduce nesta edición.